

Rumusán politik perlu - Asean

PATTAYA, Jumaat — Asean sekali lagi menyeru penyelesaian politik masalah Kampuchea dan menolak kemungkinan memberi bantuan tentera kepada kumpulan-kumpulan nasionalis yang berjuang untuk mengusir 200,000 tentera Vietnam di negara itu.

Menteri-menteri Luar Asean mengeluarkan kenyataan bersama di akhir persidangan sehari di sini semalam, menggesa pemimpin-pemimpin Khmer Rouge menerima usaha Asean untuk menubuhkan sebuah kerajaan campuran sebagai penyelesaian politik mengakhiri pendudukan tentera Vietnam.

Tetapi dalam sidang akhbar, Menteri Luar Singapura S. Dhanabalan berkata terpulang kepada negara-negara Asean secara individu sama ada untuk memberi bantuan tentera kepada pejuang-pejuang nasionalis di Kampuchea.

Rejim Khmer Rouge diiktiraf oleh Bangsa-bangsa Bersatu sebagai kerajaan yang sah di Kampuchea, walaupun tentera Vietnam mengusirnya dari Phnom Penh dalam tahun 1979.

Asean menganjurkan pertemuan antara Khmer Rouge dan kumpulan yang dipimpin oleh bekas Ketua Negara Putera Norodom Sihanouk dan bekas Perdana Menteri Son Sann awal September lalu untuk membincangkan penubuhan kerajaan campuran.

Tapi rundingan di antara tiga kumpulan itu tergendala pertengahan bulan lepas apabila Khmer Rouge berkata ia perlukan masa beberapa bulan untuk mendapatkan pandangan pengikut-pengikutnya mengenai kerajaan campuran itu.

Encik Dhanabalan memberitahu pemberita-pemberita: "Setiap negara Asean berhak memutuskan sama ada untuk memberi senjata kepada kumpulan-kumpulan individu atau kerajaan campuran jika ia ditubuhkan."

Tetapi Menteri Luar Filipina, Carlos Romulo, menegaskan bahawa Asean bukan sebuah pakatan tentera dan tidak menjadi ancaman kepada negara-negara jirannya.

Kampuchea dan Vietnam mengesakan cadangan Asean dan mensifatkannya sebagai "campurtangan".

Kenyataan bersama Menteri-menteri Luar Asean itu berkata: "Penubuhan awal sebuah kerajaan campuran akan memudahkan pencapaian matlamat-matlamat perisytiharan dan usul yang diterima oleh persidangan antarabangsa mengenai Kampuchea di New York dalam bulan Julai lalu." — Agensi.

Bahan asal dari Arkib
Negara Malaysia